



Awe consulado Dominicano na Aruba lo inaugura Plaza Juan Pablo Duarte

ORANJESTAD - Consul general di Republica Dominicana na Aruba, Josefine Rosario De Rosa, a informa cu awe lo ser realisa e acto oficial di inauguracion di e Plaza Juan Pablo Duarte cu lo tuma lugar pa 4'or atardi dilanti di hospital bieu na Oranjestad.

E diplomatico a bisa cu e acto aki lo conta cu presencia di autoridadnan di Republica Dominicana como tambe di Aruba, ya cu esaki lo ta un encuentro di hermandad pa estrecha lasonan entre e dos nacionnan.

Consul General di Republica Dominicana na Aruba, Josefine Rosario De Rosa, ta informa cu awe diasabra 14 di juni pa 4'or atardi lo ser inaugura e Plaza Juan Pablo Duarte. Tur Dominicano y pueblo di Aruba en general ta cordialmente invita pa e inauguracion di e plaza aki.

Entre e delegacion di e gobierno Dominicano lo ta presente entre otro e director di oficina supervisor di ingeniero y supervisor di obranan publico di estado Dominicano, sr. Luis Sifres. Tambe e presidente di e comision permanente di celebracion nacional, sr. Juan Daniel Balcácer, y di informacion, prensa y publicidad di presidencia, sr. Rafael Núñez. Tambe lo ta presente e director financiero di OISOE, Sr. Teodoro Tejada, entre otro personalidat nan.

Gobernador di Aruba, sr. Freddy Refunjol; Minister Presidente di Aruba, sr. Mike Eman, director di Relacionnan exterior, sr. Andy Lee, como tambe presidente di Parlamento, sr. Paul Croes y secretaria di Coseho di Minister, sra. N. Hoevertsz lo asisti na e acto protocolario di inauguracion di e Plaza Juan Pablo Duarte.

E discurso central di e ceremonia lo ta na cargo di

director di e Comision Permanente di Celebracion Nacional di Rep. Dominicana. Mientras cu di gobierno di Aruba, Minister Presidente Sr. Mike Eman lo dirigi su discurso dilanti tur esnan presente. E parti religioso lo ta den cargo di Pastoor nan Roberto y Nuris Gracia.

E plaza aki ta un bunita obra cu a embeyece e sector di Playa cerca di centro di ciudad. E artista plastico Dominicano, Manuel Toribio, ta e persona cu a elabora e busto di Duarte, basha den brons y cu un diseño apega fielmente na e figura di e heroe Dominicano.

Di awor padilanti, e colonia Dominicano di mas cu 4 mil hende residencia na Aruba lo tin oportunidad pa cada 26 di Januari duna homenahe na Juan Pablo Duarte, como tambe nan lo por celebra e conmemoracion di dia di independencia di Republica Dominicana. □